

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

晉

潘黃門

第三十四冊

V. 34

藏寶門集

潘黃門集

潘黃門集題詞

余讀潘安仁馬汧督誅惻然思古義
士猶班孟堅之傳蘇子卿也及悼亡
詩賦哀永逝文則又傷其閨房辛苦
有古落葉哀蟬之嘆史云善爲哀誄
誠然哉籍田賦客舍議並以典則見

稱陸海潘江無不善也獨惜其愍懷
詐書呈身牝后屈長卿之典冊行江
充之告變重汙泥以自辱耳閑居一
賦板輿輕軒浮杯高歌天倫樂事足
起愛慕孰知其仕宦情重方思熱客
慈母拳拳非所念也楊駿被誅綱紀

當坐安仁賴河陽舊客得脫軀命而
好進不休舉家糜滅害由小史生之
者公孫宏殺之者孫秀禍福何常古
人所以畏蜂蠆也二陸屠門戎毒相
類天下哀之遂騰討檄安仁東市獨
無憐者士之賢愚至死益見余深爲

彼美惜焉

婁東張溥題

晉潘黃門集目錄

賦

西征賦

籍田賦
有序

滄海賦

登虎牢山賦

閑居賦
有序

狹室賦

秋興賦

懷舊賦

有序

悼亡賦

寡婦賦

笙賦

相風賦

又

射雉賦

螢火賦

河陽庭前安石榴賦

有序

蓮花賦

芙蓉賦

橘賦

秋菊賦

表

上闕中詩表

議

九品議

上客舍議

頌

許由頌

贊

故太常任府君畫贊

箴

荅摯虞新婚箴

訓

兩階銅人訓

碑

司空鄭袞碑

荊州刺史東武戴侯楊使君碑

哀文

景獻皇后哀策文

哀永逝文

爲楊長文作弟仲武哀祝文

京陸公主女王氏哀辭

陽城劉氏妹哀辭

金鹿哀辭

傷弱子辭

悲邢生辭

爲任子咸妻作孤女澤蘭哀辭

祭文

弔孟嘗君文

爲諸婦祭庾新婦文

哭弟文

誄

世祖武皇帝誄

太宰魯武公誄

有序

楊荊州誄

夏侯常侍誄

馬汧督誄

楊仲武誄

宜城宣君誄

庾尚書誄

南陽長公主誄

皇女誄

賈充誄

詩

關中詩 十六章

爲賈謐作贈陸機 十一章

北芒送別王世胄

家風詩

於賈謐坐講漢書

離合

金谷集作詩

河陽縣作二首

在懷縣作二首

內顧詩二首

悼亡詩三首

哀詩

思子詩

別詩

閣柱謠

附錄

潘黃門集

目錄

王

本傳

晉潘黃門集目錄終

潘黃門集卷全

晉 滎陽潘 岳著

明 太倉張 溥閱

賦

西征賦

歲次立枵月旅蕤賓丙丁統日乙未御辰潘子
憑軾西征自京徂秦乃喟然而歎曰古往今來
邈矣悠哉寥廓忽恍化一氣而甄三才此三才
者天地人道唯生與位謂之大寶生有修短之

命位有通塞之遇、鬼神莫之要、聖智弗能豫、當
休明之盛世、今託菲薄之陋質、納旌弓於鉉台、
讚庶績於帝室、嗟鄙夫之常素、今固旣得而患
失、無柳季之直道、佐士師而一黜、武皇忽其升
遐、八音遏於四海、天子寢於諒闇、今百官聽於
冢宰、彼負荷之殊重、今雖伊周其猶殆、窺七貴
於漢庭、疇一姓之或在、無危明以安位、祗居逼
以示專、陷亂逆以受戮、匪降禍之自天、孔隨時
以行藏、遽與國而舒卷、苟蔽微以謬彰、患過辟

之未遠、悟山潛之逸士、卓長往而不反、陋吾人
之拘攣、飄萍浮而蓬轉、察位偶其隆替、名節濯
以隳落、危素卵之索殼、甚玄鷲之巢幕、心戰懼
以兢悚、如臨深而履薄、久獲歸於都外、宵未中
而難作、匪擇木以棲集、鮮林焚而鳥存、遭千載
之嘉會、皇合德於乾坤、弛秋霜之嚴威、流春澤
之渥恩、甄大義以明責、反初服於私門、皇鑒揆
余之忠誠、俄命余以末班、牧疲人於西夏、攜老
幼而入關、邱去魯而顧歎、季過沛而涕零、伊故

鄉之可懷、疾聖達之幽情、矧匹夫之安土、邈投身於鎬京、猶犬馬之戀主、竊託慕於闕庭、眷輦洛而淹涕、思纏緜於墳塋、余乃越平樂、過街郵、秣馬臯門、稅駕西周、遠矣姬德、興自高辛、思文后稷、厥初生民、率西水滸、化流岐幽、祚隆昌發、舊邦惟新、旋牧野而厯茲、愈守柔以執競、夜申旦而不寐、憂天保之未定、惟泰山其猶危、祀八百而餘慶、覽亡王之驕淫、竄南巢以投命、坐積薪以待然、方指日而比盛、人度量之乖舛、何相

越之遼迴。考土中於斯邑。成建都而營築。既定
鼎于邠鄘。遂鑕龜而啓繇。平失道而來遷。繫二
國而是祐。豈時王之無僻。賴先哲以長懋。望圉
北之兩門。感號鄭之納惠。討子頹之樂禍。尤闕
西之效戾。重戮帶以定襄。弘大順以霸世。靈擁
川以止鬪。晉演義以獻說。谷景悼以迄巧。政凌
遲而彌季。俾庶朝之遘逆。厯兩王而干位。踰十
葉以逮赧。邦分崩而爲二。竟橫噬於虎口。輸文
武之神器。澡孝水而濯纓。嘉善名而在茲。天赤

子於新安。坎路側而瘞之。亭有千秋之號。子無
七旬之期。雖勉勵於延吳。實潛慟乎余慈。眄山
川以懷古。悵攬轡於中塗。虐項氏之肆暴。坑降
卒之無辜。激秦人以歸德。成劉后之來蘇。事洄
洑而好還。卒宗滅而身屠。經澠池而長想。停余
車而不進。秦虎狼之彊國。趙侵弱之餘燼。超入
險而高會。杖命世之英蘭。耻東瑟之偏鼓。提西
缶而接刃。辱十城之虛壽。奄咸陽以取雋。出申
威於河外。何猛氣之咆勃。入屈節於廉公。若四

體之無骨。處智勇之淵偉。方鄙吝之忿悁。雖改
日而易歲。無等級以寄言。當光武之蒙塵。致王
誅於赤眉。異奉辭以伐罪。初垂翅於迴溪。不尤
眚以掩德。終奮翼而高揮。建佐命之元勲。振皇
綱而更維。登峭坂之威夷。仰崇嶺之嵯峨。皐託
墳於南陵。文違風於北阿。蹇哭孟以審敗。襄墨
纓而授戈。曾隻輪之不反。練三帥以濟河。值庸
主之矜愎。殆肆叔於朝市。任好綽其餘裕。獨引
過以歸已。明三敗而不黜。卒凌晉以雪耻。豈虛

名之可立，良致霸其有以降。曲峭而憐號，託與國於亡虞。貪誘賂以賣隣，不及臘而就拘。垂棘反於故府，屈產服于晉輿。德不逮而民無援，仲雍之祀忽諸。我徂安陽，言陟陝郭。行乎漫瀆之口，憇乎曹陽之墟。美哉邈乎，茲土之舊也。固乃周召之所分，二南之所交。麟趾信於闕雎，騶虞應乎鵲巢。愍漢氏之剝亂，朝流亡以離析。卓滔天以大滌，劫宮廟而遷跡。俾萬乘之盛尊，降遙思於征役。顧請旋於催汜，旣獲許而中惕。追皇

駕而驟戰，望玉輅而縱鎬，痛百寮之勤王，咸畢
力以致死，分身首於鋒刃，洞胸腋以流矢，有褰
裳以投岸，或攘袂以赴水，傷桴楫之褊小，撮舟
中之掬指，升曲沃而惆悵，惜兆亂而兄替，枝末
大而本，披都偶國而禍結，臧札飄其高厲，委
曹吳而成節，何莊武之無耻，徒利開而義閉，躡
函谷之重阻，看天險之矜帶，跡諸侯之勇怯，筭
嬴氏之利害，或開關以延敵，競遁逃以奔竄，有
噤門而莫啓，不窺兵於山外，連雞互而不棲，小

國合而成大。豈地勢之安危。信人事之否泰。漢
六世而拓畿縣。弘農而遠關。厭紫極之閑敞。甘
微行以遊盤。長傲賓於柏谷。妻覩貌而獻食。疇
匹婦其已泰。胡厥夫之謬官。昔明王之巡幸。固
清道而後往。懼衎縻之或變。峻徒御以誅賞。彼
白龍之魚服。挂豫且之密網。輕帝重於天下。奚
斯漸之可長。弔戾園於湖邑。諒遭世之巫蠱。採
隱伏於難明。委讒賊之趙虜。加顯戮於儲貳。絕
肌膚而不顧。作歸來之悲臺。徒望思其何補。紛

吾旣邁此全節。今又繼之以盤桓。問休牛之放
林。感徵名於桃園。發閭鄉而警策。遡黃巷以濟
潼。眺華岳之陰崖。覲高掌之遺蹤。憶江使之反
壁。告亡期於祖龍。不語怪以徵異。吾聞之於孔
公。愠韓馬之大憝。阻關谷以稱亂。魏武赫以霆
震。奉義辭以伐叛。彼雖衆其焉用。故制勝於廟
筭。殄揚桴以振塵。縑瓦解而冰泮。超遂遁而奔
狄。甲卒化爲京觀。倦狹路之迫隘。軌崎嶇以低
仰。蹈秦郊而始闢。豁爽塏以宏壯。黃壤千里沃

野彌望華實紛敷桑麻條暢邪界褒斜右濱沂
隴寶雞前鳴甘泉後涌面終南而背雲陽跨平
原而連嶓冢九嶷截辭太一龍嵒吐清風之颺
戾納歸雲之鬱蓊南有立灞素滌湯井溫谷北
有清渭濁涇蘭池周曲浸決鄭白之渠漕引淮
海之粟林茂有鄠之竹山挺藍田之玉班述陸
海珍藏張叙神臯隩區此西賓所以言於東主
安處所以聽於憑虛也可不謂然乎勁松彰於
歲寒貞臣見於國危入鄭都而抵掌義桓友之

忠規竭股肱於昏主、赴塗炭而不移、世善職於
司徒、緇衣敝而改爲履、犬戎之侵地、疾幽后之
詭惑、舉僞烽以沮衆、淫嬖褒以縱慝、軍敗戲水
之上、身死驪山之北、赫赫宗周滅爲亡國、又有
繼於此者、異哉、秦始皇之爲君也、傾天下以厚
葬、自開闢而未聞、匠人勞而弗圖、俾生埋以報
勤、外罹西楚之禍、內受牧豎之焚、語曰、行無禮
必自及、此非其効歟、乾坤以有親可久、君子以
厚德載物、觀夫漢高之興也、非徒聰明神武、豁

達大度而已也。乃實慎終追舊。篤誠款愛。澤靡
不漸。恩無不逮。率土且猶弗遺。而況於鄰里乎。
而況於卿士乎。于斯時也。乃摹寫舊豐。制造新
邑。故社易置。枌榆遷立。街衢如一。庭宇相襲。渾
雞犬以亂放。各識家而競入。籍舍怒於鴻門。沛
局蹐而來王。范諶害而弗訴。陰授劍以約莊。擗
白刃以萬舞。危冬葉之待霜。履虎尾而不噬。寔
要伯於子房。樊抗憤以卮酒。咀彘肩以激揚。忽
蛇變而龍攄。雄霸上而高驤。曾遷怒而橫撞。碎

玉斗其何傷。嬰胷組於軹塗。投素車而肉袒。疎
飲餞於東門。畏極位之盛滿。金墉鬱其萬雉。峻
崿峭以繩直。戾飲馬之陽橋。踐宣平之清閭。都
中雜沓。戶千人億。華夷士女。駢闐逼側。展名京
之初儀。卽新館而蒞職。勵疲鈍以臨朝。勗自彊
而不息。於是孟春受謝。聽覽餘日。巡省農功。周
行廬室。街里蕭條。邑居散逸。營宇寺署。肆鄠管
庫。蕞芮於城隅者。百不一處。所謂尙冠修成。黃
棘宣明。建陽昌陰。北煥南平。皆夷漫滌蕩。無其

處而有其名、爾乃階長樂、登未央、汎太液、凌建
章、縈馭娑而欵駘盪、轡紛詣而轢承光、徘徊桂
宮、惆悵柏梁、驚雉雠於臺陂、狐兔窟於殿傍、何
黍苗之離離、而余思之芒芒、洪鐘頓於毀廟、乘
風廢而不懸、禁省鞠爲茂草、金狄遷於霸川、懷
夫蕭曹、魏邴之相、辛李、衛霍之將、銜使則蘇屬
國、震遠則張博望、教敷而彝倫序、兵舉而皇威
暢、臨危而致勇、奮投命而高節亮、暨乎稔侯之
忠、孝、淳、深、陸、賈、之、優、遊、宴、喜、長、卿、淵、雲、之、文、子、

長政駿之史趙張三王之尹京定國釋之之聽
理汲長孺之正直鄭當時之推士終童山東之
英妙賈生洛陽之才子飛翠綉拖鳴玉以出八
禁門者衆矣或被髮左衽奮迅泥滓或從容傳
會望表知裏或著顯績而嬰時戮或有大才而
無貴仕皆揚清風於上列垂令聞而不已想珮
聲之遺響若鏗鏘之在耳當音鳳恭顯之任勢
也乃熏灼四方震耀都鄙而死之日曾不得與
夫十餘公之徒隸齒名才難不其然乎望漸臺

而扼腕。梟巨猾而餘怒。揖不疑於北闕。軼樗里
於武庫。酒池鑒於商辛。追覆車而不悟。曲陽僭
於白虎。化奢淫而無度。命有始而必終。孰長生
而久視。武雄略其焉在。近惑文成而溺五利。佯
造化以制作。窮山海之奧祕。靈若翔於神島。犇
鯨浪而失水。曝鱗骼於漫沙。隕明月以雙墜。擢
仙掌以承露。干雲漢而上至。致叩蒟其奚難。惟
余欲而是恣。從逸遊於角觝。絡甲乙以珠翠。忍
生人之減半。勒東岳以虛美。超長懷以遐念。若

循環之無賜較。面朝之煥炳。次後庭之猗靡壯。
當熊之忠勇。深辭輦之明智。衛鬢髮以光鑒。趙
輕體之纖麗。咸善立而聲流。亦寵極而禍侈。津
便門以右轉。究吾境之所暨。掩細柳而撫劒。快
孝文之命帥。周受命而忘身。明戎政之果毅。距
華蓋於壘和。案乘輿之尊轡。肅天威之臨顏。率
軍禮以長撻。輕棘霸之兒戲。重條侯之倨貴。索
杜郵其焉在。云孝里之前號。惘輟駕而容與。哀
武安以興悼。爭伐趙以徇國。定廟筭之勝負。扞

矢言而弗納，反推怨以歸咎。未十里於遷路，尋
賜劔以刎首。嗟主闇而臣疾，禍于何而不有。窺
秦墟於渭城，冀闕緬而堙盡。覓陞殿之餘基，裁
岷岷以隱嶙。想趙使之抱壁，瀏睨楹以抗憤。燕
圖窮而荆發，紛絕袖而自引。筑聲厲而高奮，狙
潛鉛以脫臙。據天位其若茲，亦狼狽而可懲。簡
良人以自輔，謂斯忠而鞅賢。寄苛制於捐灰，矯
扶蘇於朔邊。儒林填於坑穽，詩書煬而爲煙。國
滅亡以斷後，身刑轅以啓前。商法焉得以宿黃

犬有可復牽、野蒲變而成脯、苑鹿化以爲馬、假
讒賊以天權、鉗衆口而寄坐、兵在頸而顧問、何
爲不早而告我、我願黔黎其誰聽、惟請死而獲可
逮子嬰之果決、敢討賊以舒禍、勢土崩而莫振、
作降王於路左、蕭收圖以相劉、料險易與衆寡、
羽天與而不取、冠沐猴而縱火、貫三光而洞九
泉、曾未足以喻其高下、感市閭之菽井、歎尸韓
之舊處、丞屬號而守闕、人百身以納贖、豈生命
之易投、誠惠愛之洽、著訐望之以求直、亦余心

之所惡思夫人之政術實幹時之良具苟明法以釋憾不愛才以成務弘大體以高貴非所望於蕭傳造長山而慷慨偉龍顏之英主胸中豁其洞開羣善湊而必舉存威格乎天區亡墳掘而莫禦臨掩坎而索朴步毀垣以延伫越安陵而無譏諒惠聲之寂寞弔爰絲之正議伏梁劒於東郭訊景皇於陽上爰信讒而矜詐殞吳嗣於局下益發怒於一搏成七國之稱亂翻助逆以誅錯恨過聽之無計茲沮善而勸惡咎孝元

於渭塋執奄尹以明貶。褒夫君之善行。廢園邑以崇儉。過延門而責成。忠何辜而爲戮。昭社稷之王章。俾幽死而莫鞠。怵淫嬖之凶忍。勦皇統之孕育。張舅氏之奸漸。貽漢宗以傾覆。刺哀主於義域。僭天爵於高安。欲法堯而承禪。永終古而不刊。瞰康園之孤墳。悲平后之專絜。殃厥父之篡逆。蒙漢耻而不雪。激義誠而引決。赴丹焰以明節。投宮火而焦糜。從灰燼而俱滅。驚橫橋而旋軫。厯弊邑之南垂。門磁石而梁木。蘭兮構

阿房之屈、奇疏南山以表闕、倬樊川以激池、役
鬼傭其猶否、矧人力之所爲、工徒斲而未息、義
兵紛以交馳、宗祧汚而爲沼、豈斯宇之獨隳、由
僞新之九廟、誇宗虞而祖黃、驅吁嗟而妖臨、搜
佞哀以拜郎、誦六藝以飾姦、焚詩書而面牆心
不則於德義、雖異術而同亡、宗孝宜於樂遊、紹
衰緒以中興、不獲事于敬養、盡加隆於園陵、兆
惟奉明邑號千人、訊諸故老、造自帝詢、隱王母
之非命、縱聲樂以娛神、雖靡率於舊典、亦觀過

而知仁、憑高望之、陽隈體川陸之污隆、開襟乎
清暑之館、遊目乎五柞之宮、交渠引漕、激湍生
風、乃有昆明池乎其中、其池則湯湯汗汗、滉漾
彌漫、浩如河漢、日月麗天、出入乎東西、旦似暘
谷、夕類虞淵、昔豫章之名字、披玄流而特起、儀
景星以天漢、對牛女以雙峙、圖萬載而不傾、奄
摧落於十紀、擢百尋之層觀、今數仞之餘址、振
鷺于飛鳧、躍鴻漸、乘雲頡頏、隨流澹淡、滉潏驚
波、唼唼菱茨、華蓮爛於綠沼、青蕃蔚乎翠瀵、伊

茲池之肇，穿肄水戰於荒服，志勤遠以極武良，
無邀於後福，而菜蔬芼實，水物惟錯，乃有瞻乎
原陸，在皇代而物土，故毀之而又復，凡厥寮司，
旣富而教，咸帥貧情，同整楫棹，收畧課獲，引繳
舉效，鰥夫有室，愁民以樂，徒觀其鼓枹迴輪，灑
鉤投網，垂餌出入，挺杙來往，纖經連白，鳴根厲
響，貫鰓芟尾，掣三牽兩，於是弛青鯤於網鉅，解
頰鯉於黏微，華魴躍鱗，素鰠揚鬐，養人縷切，鑿
刀若飛，應刃落俎，霍霍霏霏，紅鮮紛其初載，賓

旅竦而遲御，旣餐服以屬厭，泊恬靜以無欲，廻
小人之腹，爲君子之慮，爾乃端策拂茵，彈冠振
衣，徘徊豐鎬，如渴如饑，心翹勤以仰止，不加敬
而自祇，豈三聖之敢夢，竊十亂之或希，經始靈
臺，成之不日，惟鄙及豐，仍京其室，庶人子來，神
降之吉，積德延祚，莫貳其一，永惟此邦，云誰之
識，越可略聞，而難臻其極，子嬴鋤以借父訓，秦
法而著色，耕讓畔以閒田，沾姬化而生棘，蘇張
喜而詐騁，虞芮愧而訟息，由此觀之，土無常俗，

而教有定式、上之遷下、猶釣之埏埴、雖五方雜
會、風流溷淆、情農好利、不昏作勞、密邇獫狁、戎
馬生郊、而制者必割、實存操刀、人之升降、隨政
隆替、杖信則莫不用情、無欲則賞之不竊、雖智
不能理、明不能察、信此心也、庶免夫戾、如其禮
樂、以俟來哲、

籍田賦

伊晉之四年正月丁未、皇帝親率羣后、籍於千
畝之甸、禮也、於是乃使甸師清畿、野廬掃路、封

人墳宮掌舍設桓青壇蔚其嶽立兮翠幙黝以
雲布結崇基之靈址兮啓四塗之廣阼沃野墳
腴膏壤平砥清洛濁渠引流激水遐阡繩直邇
陌如矢葱牓服於縹輶兮紺轅綴於黛輶儼儲
駕於厯左兮俟萬乘之躬履百僚先置位以職
分自上下下具惟命臣襲春服之萋萋兮接游
車之麟麟微風生於輕幃兮纖埃起於朱輪森
奉璋以偕列兮望皇軒而肅震若湛露之晞朝
陽兮衆星之拱北辰也於是前驅魚麗屬車鱗

萃閭闔洞起參塗方駟常伯陪乘太僕秉轡后
妃獻種桂之種司農撰播殖之器挈壺掌升降
之節宮正設門閭之蹕天子乃御玉輦蔭華蓋
衝牙錚鎗綃紕綵縹金根照耀以炯晃兮龍驤
騰驤而沛艾表朱玄於離坎飛青縞於震兌中
黃曄以發暉兮方綵紛其繁會五輅鳴鑾九旗
揚旒瓊輅人藥雲罕晻藹簫管嘲嗒以啾嘈兮
鼓鞀砒歷以砰磕筍虡嶷以軒翥兮洪鍾越乎
區外震震填填塵鷺連天以幸乎籍田蟬冕頌

以灼灼兮、碧色肅其千千、似夜光之剖荆璞兮、
若茂松之依山巔也、於是我皇、乃降靈壇、撫御
耦游、場染屨、洪縻在手、三推而舍、庶人終畝、貴
賤以班、或五或九、于斯時也、居靡都鄙、民無華
裔、長幼雜遝、以交集、士女頌斌而咸戾、被褐振
裾、垂髻總髻、躡踵側肩、倚裳連襪、黃塵爲之四
合兮、陽光爲之潛翳、動容發音、而觀者莫不抃
舞乎康衢、謳吟乎聖世、情欣樂乎昏作兮、慮盡
力乎樹藝、靡推督而常勤兮、莫之課而自勵、躬

先勞以悅使今豈嚴刑而猛制哉有邑老田父
或進而稱曰蓋損益隨時理有常然高以下爲
基民以食爲天正其未者端其本善其後者慎
其先夫九土之宜弗任四民之務不一野有菜
蔬之色朝乏代耕之秩無儲蓄以虞災徒望歲
以自必三代之衰皆此物也今聖上昧旦丕顯
夕惕若慄圖匱於豐防儉於逸欽哉欽哉惟穀
之恤展三時之弘務致倉廩於盈溢固堯湯之
用心而存救之要術也若乃廟祧有事祝宗諏

日簋簋普淖則此之自實縮鬯蕭茅又於是乎
出黍稷馨香旨酒嘉粟宜其時和年登而神降
之吉也古人有言曰聖人之德無以加於孝乎
夫孝者天地之性人之所由靈也昔者明王以
孝治天下其或繼之者鮮哉希矣逮我皇晉實
光斯道儀刑孚於萬國愛敬盡於祖考故躬稼
以供粢盛所以致孝也勸穡以足百姓所以固
本也能本而孝盛德大業至矣哉此一役也而
二美具焉不亦遠乎不亦重乎敢作頌曰思樂

甸畿薄採其茅，大君戾止，言藉其農，其農三推，
萬方以祗，耨我公田，遂及我私，我簠斯盛，我簋
斯齊，我倉如陵，我庾如坻，念茲在茲，永言孝思，
人力普存，祝史正辭，神祇攸歆，逸豫無期，一人
有慶，兆民賴之。

滄海賦

徒觀其狀也，則湯湯蕩蕩，瀾漫形沈，流沫千里，
懸水萬丈，測之莫量其深，望之不見其廣，無遠
不集，靡幽不通，群谿俱息，萬流來同，舍三河而

納四瀆朝五湖而夕九江陰霖則興雲降雨陽
霽則吐霞曜日煮水而鹽成剖蚌而珠出其中
有蓬萊名嶽青邱奇山阜陵別島崕環其間其
山則螺崔嵬萃嵯峨降屈披滄流以特起擢崇
基而秀出其魚則有吞舟鯨鯢鰲鰾龍鬚蜂目
豺口狸斑雉軀恠體異名不可勝圖其蟲獸則
素蛟丹虬元龜靈鼉脩鼉巨鼈紫貝螭蛇玄螭
蚺虬赤龍焚蘊遷體改角推舊納新舉扶搖以
抗翼泛陽侯以濯鱗其禽鳥則鷗鴻鸕鶿鴛鴦

鳩鵲、朱青、煒燁、縹翠、葱青、詳察波浪之來往、遍聽奔激之音響、力勢之所迴薄、潤澤之所彌廣、信普天之極大、橫率土而莫兩、

登虎牢山賦

辭京輦兮遙邁、將遠遊兮東夏、朝發軔兮帝壖、夕結軌兮中野、憑脩坂兮停車、臨寒泉兮飲馬、眷故鄉之遼隔、思紆軫以鬱陶、步玉趾以升降、凌汜水兮登虎牢、覽河洛之二川、眺成平之雙阜、崇嶺驪以崔崒、幽谷豁以窅寥、路透迤以迫

隘林廓落以蕭條爾乃仰蔭嘉木俯藉芳卉青
烟鬱其相望棟宇懍以鱗萃彼登山而臨水固
先喆之所哀矧去鄉而離家邈長辭而遠乖望
歸雲以歎息腸一日而九迴良勞者之詠事爰
寄言以表懷

閑居賦

有序

岳嘗讀汲黯傳至司馬安四至九卿而良史題
之以巧宦之目未嘗不慨然廢書而歎曰嗟乎
巧誠有之拙亦宜然顧常以爲士之生也非至

聖無軌、微妙立通者、則必立功立事、效當年之
用、是以資忠履信、以進德脩辭、立誠以居業、僕
少竊鄉曲之譽、忝司空太尉之命、所奉之主、卽
太宰魯武公、其人也、舉秀才爲郎、逮事世祖武
皇帝、爲河陽懷令、尚書郎、廷尉平、今天子諒闇
之際、領太傅主簿、府主誅、除名爲民、俄而復官、
除長安令、遷博士、未召拜、親疾輒去官、免、自弱
冠、涉乎知命之年、八徙官、而一進階、再免、一除
名、一不拜職、遷者三而已矣、雖通塞有遇、抑亦

拙者之效也。昔通人和長輿之論余也，固曰拙於用多。稱多則吾豈敢言拙信而有徵。方今俊乂在官，百工惟時，拙者可以絕意乎寵榮之事矣。太夫人在堂，有羸老之疾，尚何能違膝下色養而屑屑從斗筲之役乎？於是覽止足之分，庶浮雲之志，築室種樹，逍遙自得，池沼足以漁釣，春稅足以代耕，灌園鬻蔬以供朝夕之膳，牧羊酤酪以俟伏臘之費，孝乎，惟孝友於兄弟，此亦拙者之爲政也。乃作閑居之賦以歌事遂情焉。

其辭曰

遨墳素之長圃，步先哲之高衢。雖吾顏之云厚，
猶內愧於寧遠。有道余不仕，無道吾不愚。何巧
智之不足，而拙艱之有餘也。於是退而閑居，于
洛之涘，身齊逸民，名綴下士。背京沂伊，而郊後
市。浮梁黜以徑度，靈臺傑其高峙。窺天文之秘
奧，覩人事之終始。其西則有元戎禁營，玄幙綠
徽。谿子巨黍，異秦同歸。礮石雷駭，激矢蜚飛。以
先啓行，曜我皇威。其東則有明堂辟雍，清穆敞

閑環林縈映，圓海迴淵聿。追孝以嚴父，宗文考以配天。祇聖敬以明順，養更老以崇年。若乃背冬涉春，陰謝陽施。天子有事於柴燎，以郊祖而展義。張鈞天之廣樂，備千乘之萬騎。服振振以齊玄管，啾啾而並吹。煌煌乎隱隱乎，茲禮容之壯觀。而王制之巨麗也。兩學齊列，雙宇如一。右延國胄，左納良逸。祁祁生徒，濟濟儒術。或升之堂，或入之室。教無常師，道在則是。故髦士投綬，名王懷璽。訓若風行，應猶草靡。此里仁所以爲

美、孟母所以三徙也、爰定我居、築室穿池、長楊
映沼、芳枳樹籬、遊鱗瀟灑、菡萏敷披、竹木蓊藹、
靈果參差、張公大谷之梨、梁侯烏桺之柿、周文
弱枝之棗、房陵朱仲之李、靡不畢殖、三桃表櫻、
胡之別、二柰曜丹白之色、石榴蒲桃之珍、磊落
蔓衍乎其側、梅杏郁棣之屬、繁榮藻麗之飾、華
實照爛、言所不能極也、菜則葱韭蒜芋、青筍紫
薑、薑薺薺甘肅、蓼蔞芬芳、蘘荷依陰、時藿向陽、綠
葵含露、白薤負霜、於是凜秋暑退、熙春寒往、微

雨新晴六合清朗太夫人乃御板輿升輕軒遠
覽王畿近周家園體以行和藥以勞宣常膳載
加舊病有痊席長筵列孫子柳垂蔭車結軌陸
摘紫房水挂頽鯉或宴於林或禊于汜昆弟斑
白兒童稚齒稱萬壽以獻觴咸一懼而一喜壽
觴舉慈顏和浮杯樂飲絲竹駢羅頓足起舞抗
音高歌人生安樂孰知其他退求已而自省信
用薄而才劣奉周任之格言敢陳力而就列幾
陋身之不保而奚擬乎明哲仰衆妙而絕思終

優游以養拙

狹室賦

厯甲第以遊觀，旋陋巷而言歸。伊余館之褊狹，
良窮弊而極微。閤寥戾以互掩，門崎嶇而外扉。
室側戶以攢楹，檐接柜而交棖。當視融之御節，
熾朱明之隆暑。沸體怒其如鑠，珠汗揮其如雨。
若乃重陰晦冥，天威震曜。漢潦沸騰，叢溜奔激。
曰竈爲之沉溺，器用爲之浮漂。彼處貧而不怨，
嗟生民之攸難。匪廣廈之足榮，有切身之近慮。

青陽萌而畏暑，白藏兆而懼寒。獨味道而不悶，喟然向其時歎。

秋興賦

晉十有四年，余春秋三十有二，始見二毛。以太尉掾兼虎賁中郎將，寓直于散騎之省，高閣連雲，陽景罕曜。珥蟬冕而襲紈綺之士，此焉遊處。僕野人也，偃息不過茅屋茂林之下，談話不過農夫田父之客。攝官承乏，猥廁朝列。夙興晏寢，匪遑底甯。譬猶池魚籠鳥，而有江湖山藪之思。

於是染翰操紙慨然而賦于時秋也故以秋興
命篇其辭曰

四運忽其代序兮萬物紛以廻薄覽花時之時
育兮察盛衰之所託感冬索而春敷嗟夏茂而
秋落雖末事之榮悴兮伊人情之美惡善乎宋
生之言曰悲哉秋之爲氣蕭瑟兮草木搖落而
變衰慘慄兮若在遠行登山臨水送將歸夫送
歸懷慕徒之戀兮遠行有羈旅之憤臨川感流
以歎逝兮登山懷遠以悼近彼四感之疚心兮

遭一塗其難忍嗟秋日之可哀兮良無愁而不
盡野有歸鷺隰有翔隼游氛朝興搞葉夕殞於
肯乃屏輕箠釋纖絺藉莞弱御袷衣庭樹撼以
灑落勁風戾而吹帷蟬嘒嘒以寒吟雁飄飄而
南飛天晃朗以彌高日悠陽而浸微何微陽之
短晷覺涼夜之方永月朧朧以含光兮露淒清
以凝冷熠燿粲於階闥兮蟋蟀鳴乎軒屏聽離
鴻之晨吟望流火之餘景宵耿介而不寐兮獨
展轉於華省悟時歲之遒盡兮慨俛首而自省

斑鬢彪以承弁兮，素髮颯以垂領。仰羣僞之逸軌兮，攀雲漢以遊騁。登春臺之熙熙，珥金貂之炯炯。苟趣捨之殊途兮，庸詎識其躁靜。聞至人之休風兮，齊天地於一指。彼知安而忘危兮，固出生而入死。行投趾於容跡兮，殆不踐而獲底。闕側足以及泉兮，雖猴猿而不履。龜祀骨於宗祧兮，思反身於綠水。且歛衽以歸來兮，忽投紱以高厲。耕東臯之沃壤兮，輸黍稷之餘稅。泉涌湍於石間兮，菊揚芳乎崖溼。澡狄水之涓涓兮，

玩游鯈之漈漈逍遙乎山川之阿放曠乎人間
之世優哉游哉聊以卒歲

懷舊賦

有序

余十二而獲見於父友東武戴侯楊君始見知
名遂申之以婚姻而道元公嗣亦隆世親之愛
不幸短命父子凋殞余既有私艱且尋役於外
不、歷、嵩、邱、之、山、者、九、年、于、茲、矣、今、而、經、焉、慨、然
懷舊乃作賦曰

啓開陽而朝邁濟清洛以徑度晨風淒以激冷

夕雪皛以掩路，轍含冰以滅軌，水漸軻以凝沍，塗艱屯其難進，日晡晚而將暮，仰睎歸雲，俯鏡泉流，前瞻太室，傍眺嵩丘，東武托焉，建瑩啓疇，巖巖雙表，列列行楸，望彼楸矣，感于予思，旣興慕於戴侯，亦悼元而哀嗣，墳纍纍以接隴，栢森森以攢植，何逝沒之相尋，曾舊草之未異，余總角而獲見，承戴侯之清塵，名余以國士，眷余以嘉姻，自祖考而隆好，逮二子而世親，歡携手以偕老，庶報德之有隣，今九載而一來，五臣作空

館闋其無人，陳芟被於堂除。舊圃化而爲薪步，
庭廡以徘徊。涕泣流而霑巾，宵展轉而不寐。驟
長嘆以達晨，獨鬱結其誰語。聊綴思於斯文，

悼亡賦

伊良嬪之初降，幾二紀以迄茲。遭兩門之不造，
備荼毒而嘗之。嬰生艱之至極，又薄命而早終。
含芬華之芳烈，翩零落而從風。神飄忽而不反，
形安得而久安。襲時服於遺質，表鉛華於餘顏。
問筮賓之何期，宵過分而參闌。詎幾時而見之，

日眷戀以相屬、聽轍人之唱籌、來聲叫以連續、
聞冬夜之恒長、何此夕之一促、且伉儷之胖合、
垂明哲乎嘉禮、苟此義之不謬、乃全身之半體、
吾聞喪禮之在妻、謂制重而哀輕、旣履冰而知
寒、吾今信其緣情、久旣昏兮朝旣清、延爾族兮
臨後庭、入空室兮望靈座、帷飄飄兮燈熒熒、燈
熒熒兮如故、帷飄飄兮若存、物未改兮人已化、
饋生塵兮酒停樽、春風兮泮冰、初陽兮戒溫、逝
道遙兮浸遠、嗟熒熒兮孤魂、

寡婦賦有序

樂安任子咸有韜世之量、與余少而歡焉、雖兄弟之愛、無以加也、不幸弱冠而終、良友既沒、何痛如之、其妻又吾姨也、少喪父母、適人、而所天又殞、孤女藐焉、始孩、斯亦生民之至難、而荼毒之極哀也、昔阮瑀既沒、魏文悼之、竝命知舊作寡婦之賦、余遂擬之、以作敘其孤寡之心焉、其辭曰、

嗟余生之不造、今哀天難之匪忱、少伶俜而偏

孤兮痛忉怛以摧心、覽寒泉之遺歎兮、詠蓼莪
之餘音、情長感以永慕兮、思彌遠而逾深、伊女
子之有行兮、爰奉嬪於高族、承慶雲之光覆兮、
何君子之惠渥、顧葛藟之蔓延兮、託微莖於樛
木、懼身微而施重兮、若履冰而臨谷、遵義方之
明訓兮、憲女史之典戒、奉蒸嘗以效順兮、供灑
掃以彌載、彼詩人之攸歎兮、徒願言而心痗、何
遭命之奇薄兮、遘天禍之未悔、榮華燁其始茂
兮、良人忽以捐背、靜閨門以窮居兮、塊然獨而

靡依易錦茵以苦席兮，代羅幃以素帷。命阿保而就列兮，覽巾箠以舒悲。口嗚咽以失聲兮，淚橫迸而霑衣。愁煩寃其誰告兮，提孤孩於坐側。時曖曖以向昏兮，日杳杳以西匿。雀羣飛而赴楹兮，雞登棲而歛翼。歸空館而自憐兮，撫衾裯而嘆息。思纏綿以膺亂兮，心摧傷以愴惻。曜靈曄而遄邁兮，四節運而推移。天凝露以降霜兮，木葉落而隕枝。仰神宇之寥寥兮，瞻靈衣之披披。退幽悲於堂隅兮，進獨拜於牀垂。耳傾想於

疇昔兮、目彷彿乎平素、雖冥冥而罔覲兮、猶依
依以憑附、痛存亡之殊制兮、將遷神而安厝、龍
輜儼其星駕兮、飛旒翩以啓路、輪按軌以徐進
兮、馬悲鳴而跼顧、潛靈邈其不反兮、殷憂結而
靡訴、晞形影於几筵兮、馳精爽於邱墓、自仲秋
而在疚兮、踰履霜以踐冰、雪靡靡而驟落兮、風
瀏瀏而風興、霽泠泠而夜下兮、冰五臣作水非濂濂
以微凝、意怱怱以遷越兮、神一夕而九升、庶浸
遠而哀降兮、情惻惻而彌甚、願假夢以通靈兮、

日炯炯而不寢，夜漫漫以悠悠。今寒淒淒以凜
凜，氣憤薄而乘胸。今涕交橫而流枕，亡魂逝而
永遠。今時歲忽其邁盡，容貌偶以頓頓。今左右
淒其相慙，感三良之殉秦。今甘捐生而自引，鞠
稚子於懷抱。今嗟低徊而不忍，獨指景而心誓。
今雖形存而志殞，重曰：仰皇穹兮嘆息，私自憐
兮何極。省微身兮孤弱，顧稚子兮未識。如涉川
兮無梁，若凌虛兮失翼。上瞻兮遺像，下臨兮泉
壤。窈冥兮潛翳，心存兮目想。奉靈坐兮肅清，愬

空宇兮曠朗，廓孤立兮顧影。塊獨言兮聽響，顧
影兮傷摧。聽響兮增哀，遙逝兮逾遠。緬邈兮長
乖，四節流兮忽代序。歲云暮兮日西頽，霜被庭
兮風入室。夜旣分兮星漢迴，夢良人兮來遊。若
聞闔兮洞開，怛驚悟兮無聞。超惝恍兮慟懷，慟
懷兮奈何。言陟兮山阿，墓門兮肅肅。脩隴兮
我，孤鳥嚶嚶兮悲鳴。長松萋萋兮振柯，哀鬱結
兮交集。淚橫流兮滂沱，蹈恭姜兮明誓。詠栢舟
兮清歌，終歸骨兮山足。存憑託兮餘華，要吾君

兮同穴之死矢兮靡他

笙賦

河汾之寶有曲沃之懸匏焉鄒魯之珍有汶陽之孤篠焉若乃縣蔓紛敷之麗浸潤靈液之滋隅隈夷險之勢禽鳥翔集之嬉固衆作者之所詳余可得而略之也徒視其制器也則審洪纖面短長劑生斡裁熟簧設宮分羽經徵列商泄之反謚厭焉乃揚管攢羅而表列音要妙而含清各守一以司應統大魁以爲笙基黃鍾以舉

韻望儀鳳以擢形寫皇翼以插羽摹鸞音以厲
聲如鳥斯企翾翾岐岐明珠在味若銜若垂脩
搥內辟餘簫外透駢田獵擺鯢鯨參差於是乃
有始泰終約前榮後悴激憤於今賤永懷乎故
貴衆滿堂而飲酒獨向隅而掩淚援鳴笙而將
吹先喤噦以理氣初雍容以安暇中佛鬱以怫
惛終鬼戕以蹇諤又颯迅而繁沸罔浪孟以惆
悵若欲絕而復肆慟傲糴以奔邀似將放而中
匱愀愴惻減虺疇煜熠汎滛汎豔雪燁炭炭或

案衍夷靡或竦勇剽急或旣往不反或已出復
入徘徊布濩渙衍葺襲舞旣蹈而中輟節將撫
而不及樂聲發而盡室歡悲音奏而列坐泣擗
纖翮以震幽簧越上筦而通下管應吹噏以往
來隨抑揚以虛滿勃慷慨以慘亮顧躊躇以舒
緩輟張女之哀彈流廣陵之名散詠園桃之天
天歌棗下之纂纂歌曰棗下纂纂朱實離離宛
其死矣化爲枯枝人生不能以行樂死何以虛
謚爲爾乃引飛龍鳴鷓鴣雙鴻翔白鶴飛子喬

輕舉、明君懷歸、荆王喟其長吟、楚妃歎而增悲、
夫其悽喚、辛酸、嚶嚶關關、若離鴻之鳴子也、含
嘲、嘽諧、雍雍、啾啾、若羣雛之從母也、郁將劫悟、
泓宏、融裔、哇咬、嘲啾、壹何察慧、訣厲、悄切、又何
磬折、若夫時陽初暖、臨川送離、酒酣、徒擾、樂闌
日移、疎客始闌、主人微疲、弛絃、韜籥、徹塤、屏箎、
爾乃促中筵、携友生、解嚴顏、擢幽情、披黃苞、以
授甘、傾縹瓷、以酌醽、光妓儼其階、列雙鳳、嘈以
和鳴、晉野悚而投琴、況齊瑟與秦箏、新聲變曲

奇韻橫逸，縈纏歌鼓，網羅鐘律，爛熳熠燿，以放豔
鬱蓬勃，以氣出，秋風詠於燕路，天光重於朝日，
大不踰宮，細不過羽，唱發章夏，導揚韶武，協和
陳宋，混一齊楚，邇不逼而遠無攜，聲成文而節
有叙，彼政有失得，而化以醕薄，樂所以移風於
善，亦所以易俗於惡，故絲竹之器未改，而桑濮
之流已作，惟簧也能研羣聲之清，惟笙也能總
衆清之林，衛無所措其邪，鄭無所容其淫，非天
下之和樂，不易之德音，其孰能與於此乎？

相風賦

混元恍其初判，二氣變而無窮。動靡微而不兆，
象有始而必終。思先天而不違，立成器以相風。
棲靈鳥於帝庭，似月離乎紫宮。飛輕羽於竿杪，
若鸞翔乎雲中。廣莫興而習坎，景風發而遡離。
闐闐揚而西指，明庶起而東移。

又

採脩竹于層城，歷寒暑而靡凋。踞神獸於下趾，
棲靈鳥于上標。

射雉賦

涉青林以游覽兮，樂羽族之羣飛。聿采毛之英麗兮，有五色之名翬。厲耿介之專心兮，參雄豔之姁姿。巡邱陵以經略兮，畫墳衍而分畿。於是青陽告謝，朱明肇授。靡木不滋，無草不茂。初莖蔚其曜新，陳柯撼以改舊。天泱泱以垂雲，泉涓涓而吐溜。麥漸漸以擢芒，雉鷩鷩而朝雊。眴箱籠以揭驕，睨驍媒之變態。奮勁骹以角搓，瞋悍目以旁睠。鶯綺翼而頰搥，灼繡頸而袞背。鬱軒

翥以餘怒，思長鳴以效能。爾乃拏場挂翳，停僮
葱翠，綠栢參差，文翮鱗次。蕭森繁茂，婉轉輕利。
衷料戾以徹鑒，表厭躡以密緻。恐吾游之晏起，
慮原禽之罕至。甘疲心於企想，分倦目以寓視。
何調翰之喬桀，邈疇類而殊才。候扇舉而清叫，
野聞聲而應媒。褰微罟已長眺，已踉蹌而徐來。
摘朱冠之超赫，敷藻翰之陪颺。首葍綠素，身挖
黼繪。青鞵莎靡，丹臆蘭綵。或蹶或啄，時行時止。
斑尾揚翹，雙角特起。良遊呃喔，引之規裏。應叱

愕立擢身竦峙捧黃閒以密穀屢岡挂以津拔
倒禽紛以迸落機聲振而未已山驚悍害森迅
已甚越壑凌岑飛鳴薄廩鯨牙低鏃心平望審
毛體摧落霍若碎錦逸羣之儔擅場挾兩櫟雌
妬異倏來忽往忌上風之餐切畏映日之儻朗
屏發布而累息徒心煩而伎憊伊義鳥之應敵
啾撲地以厲響彼聆音而逕進忽交距以接壤
彤盈窻以美發紛首頽而臆仰或乃崇墳夷靡
農不易壠稊菽叢榛翳蒼萃茸鳴雄振羽依于

其冢擱降邱以馳敵雖形隱而草動瞻挺穊之
傾掉意淦躍以振踊嗽出苗以入場愈情駭而
神悚望壓合而醫晶雉腴肩而旋踵飲余志之
精銳擬青顙而點項亦有目不步體邪眺旁剔
靡聞而驚無見自驚周環迴復繚繞盤辟戾翳
旋把縈隨所厯彳亍中輟馥焉中鏑前剗重膺
傍截疊翻若夫多疑少決膽劣心狷內無固守
出不交戰來若處子去如激電闕問薊葉慎厯
乍見於是計分銖商遠邇揆懸刀騁絕伎如轉

如軒不高不埤當味佴胸裂膝破背夷險殊地
馴麤異變晁不暇食冬不告勸昔賈氏之如臯
始解顏於一箭醜夫爲之改貌憾妻爲之釋怨
彼遊田之致獲咸乘危以馳驚何斯藝之安逸
嗟禽從其已豫清道而行擇地而住尾飾鑣而
在服肉登俎而永御豈唯皂隸此焉君舉若乃
耽盤流遁放心不移忘其身恤司其雄雌樂而
無節端操或虧此則老氏之所誠而君子之所
不爲

螢火賦

喜熠燿之精將，與衆類乎超殊。東山感而增嘆，
行士慨而懷憂。翔太陰之玄昧，抱夜光以清遊。
頰若飛電之宵逝，譬似移星之雲流。動集陽暉，
灼如隋珠。熠燿熒熒，若丹英之照葩。飄飄頻頻，
若流金之在沙。載飛載止，光色孔嘉。無聲無臭，
明影暢遐。軟朝霞於曠野，庇一葉之垂柯。無干
欲於萬物，豈顧恤于網羅。至夫重陰之夕，風雨
晦暝。萬物眩惑，翩翩獨征。竒姿燎朗，在陰益榮。

猶賢折之處時時昏昧而道明若蘭香之在座
越群臭而彌馨隨陰陽以飄飄非飲食之是營
問螽斯之無忌希夷惠之清貞美微虫之琦瑋
援彩筆以爲銘

河陽庭前安石榴賦

有序

石榴者天下之奇樹九州之名果也是以屬文
之士叙而賦之

仰天路而高睇顧隣國以相望位莫微於宰邑
館莫陋于河陽雖小縣陋館可以遨遊實有嘉

木曰安石榴，脩條外暢，榮幹內樛，扶疎偃蹇，苒
弱紛柔，於是暮春告謝，朱夏戒初，新莖擢潤膏
葉垂腴，曾華晬以先越，含榮鶚其方敷，丹暉綬
於朱房，細的點乎紅鬚，煌煌煒煒，熠爚委累，似
琉璃之棲鄧林，若珊瑚之映綠水，光明燐爛，含
丹耀紫，味滋芳神，色麗瓊藥，遙而望之，煥若隋
珠擢重淵，詳而察之，灼若列星出雲間，千房同
模，千子如一，御渴療饑，解醒止疾，旣乃攢乎狹
庭，載阨載逼，土階無等，肩牆惟淺，壁衣蒼苔，瓦

被駁蘚處悴而榮在幽彌顯其華可玩其實可
珍羞于王公薦于鬼神豈伊仄陋用渝厥貞莫
猶如之而況於人

蓮花賦

偉玄澤之普衍嘉植物之並敷遊莫美于春臺
華莫盛于芙蕖於是惠風動冲氣和眄清池翫
蓮花舒綠葉挺纖阿結綠房列紅葩仰含清液
俯濯素波修柯婀娜柔莖苒弱流風徐轉迴波
微激其望之也曄若皦日燭崑山其卽之也晃

若盈尺映藍田

芙蓉賦

蔭蘭池之豐沼，育沃野之上腴。課衆榮而比觀，
煥卓犖而獨殊。押膈雲布，窈咤星羅。光擬燭龍，
色奪朝霞。丹輝拂紅，飛鬚垂的。斐披施赫，散煥
熠爚。流芬賦采，風靡雲旋。布濩磊落，蔓衍天閑。
發清陽而增媚，潤白玉而加鮮。

橘賦有序

余齋前橘樹，冬夏再熟，聊爲賦云爾。

嗟嘉卉之芬華，信氛氲而芬馥。旣蓊茸而萎蕤，
且參差而櫛蠹。已鬱鬱而冬茂，亦離離而夏熟。
至如廣命賓客，厯覽遊觀。三清旣設，百味星爛。
炫煁乎玉案，照耀於金盤。故成都美其家園，江
陵重其千樹。旣見稱於陸言，亦標名乎馬賦。

秋菊賦

垂采煒於芙蓉，流芳越乎蘭林。遊女望榮而巧
笑，鵷雛遙集而弄音。若乃真人採其實，王母接
其葩。或充虛而養氣，或增妖而揚娥。旣延期以

永壽又蠲疾而弭病

表

上關中詩表

詔臣作關中詩，輒奉詔竭愚作詩一篇，案漢記孝明時，護羌校尉竇林上降羌顛岸，以爲羌豪，岸兄顛吾復降，問事狀，林對前後兩屈，坐誣罔下獄死，齊萬年編戶隸屬，爲日久矣，而死生異辭，必有詭譎，故引證喻，以懲不恪。

潘黃所集

卷全

三

...

...

...

...

...

...

...

...

1906637

書

詐作愍懷太子書

陛下宜自了、不自了、吾當入了之、中宮又宜速
自了、不了、吾當手了之、并謝妃共要尅期而兩
發、勿疑猶豫、致後患、茹毛飲血於三辰之下、皇
天許當掃除患害、立道文爲王、蔣爲內主、願成
當三牲祠北君、大赦天下、要疏如律令、

潘黃門集

卷全

一

四

議

九品議

天生烝民而樹之君。使司牧之。勿失其性。君不獨治。於是乎建牧立監。陳其輔佐。故曰天工人其代之。然則高官厚祿。非明崇賢。所以興治。卑位下役。非爲鄙愚。所以供職。雖或開榮辱之門。有爭競之弊。而百王莫之能易者。此道不可以二故也。方今天下隆乎四海。攸同薦賢達善。各以類進。夫觀民宜化。爲治之本。雖實小邑。猶須

其人又中正之身。優劣懸殊。苟知人者。智則不
知者。謬矣。莫如達官各舉其屬。方嶽九列。朝所
取信。郡守雖輕。有刺史存。舉之當否。實司其事。
考績累名。施黜陟焉。進賢受賞。不進賢甘戮。沮
勸既明。則人自爲謀。庶公道大行。而私謁息矣。

上客舍議

謹按逆旅久矣。其所由來。行者賴以頓止。居者
薄收其直。交易貿遷。各得其所。官無役賦。因人
成利。惠加百姓。而公無未費。語曰。許由辭帝堯。

之命而舍於逆旅。春秋外傳曰：晉陽處父遇甯戚於逆旅。魏武皇帝亦以爲宜。其詩曰：逆旅整設，以通商賈。然則自堯到今，未有不得客舍之法。唯商鞅尤之。此固非聖世所言也。乃今四海會同，九服納貢，八方翼翼，公私滿路，近畿輻輳，客舍亦稠。冬有溫廬，夏有涼蔭，芻秣成行，器用取給。疲牛必投乘涼近進，發楅𩓐寫鞍，皆有所憩。又諸刼盜皆起於迫絕而止乎人衆，十里蕭條，則奸軌生心，連陌接館，則寇情震懾。且聞聲有

救。已發有追。不救有罪。不追有戮。禁暴捕亡。恒有司存。凡此皆客舍之益。而官攤之所乏也。又行者貪路。告糴炊爨。皆以昏晨。盛夏晝熱。又兼星夜。既限早閉。不及攤門。或避晚關。迸逐路隅。祇是慢藏。誨盜之原。苟以客舍多敗。法教官守。棘。櫛。獨復何人。彼河橋孟津。解券輸錢。高第督。察。數。入。校。出。品。郎。兩。岸。相。檢。猶。懼。或。失。之。故。懸。以。祿。利。許。以。功。報。今。賤。吏。疲。人。獨。專。攤。稅。管。開。閉。之。權。藉。不。校。之。勢。此。道。路。之。蠹。奸。利。所。殖。也。

率厯代之舊俗。獲行留之懽心。使客舍灑掃以
待。征旅擇家而息。豈非衆庶顙顙之望。

潘黃門集

卷全

四三

100663

頌

許由頌

邈哉許公，執真履貞，辭堯天下，抱樸隱形。川渟
岳峙，澹泊無營，棲遲高山，與世靡爭。虛薄忝任，
來宰斯城，愧無惠化，豹產之政。峩峩治所，樂慕
景名，登基逍遙，來過墓庭。逼於時憲，傾筐不盈，
恨無旨酒，奠公之靈。死而不朽，公其有榮。聊述
雅美，揚公馨聲。

潘黃門集

卷全

四

贊

故太常任府君畫贊

堂堂我君，鑒象開慶，逸德宣猷，含真履素，味道
無悶，守終純固，弓與爰集，撫翼清舉，翰飛公庭，
龍升天路，初長方國，流化千里，遂管秘籍，辨章
舊史，入登常伯，出作卿士，外內惟允，庶績咸理，
中節日新，令聞不已，濟濟儒林，翼翼國子。

滑黃門集

卷全

四十五

1006637

箴

荅摯虞新婚箴

先王制禮。隨時爲正。俯從企及。豈乖物性。女無
二歸。男有再聘。女實存色。男實存德。德在居正。
色在不惑。新舊兼弘。義申理得。然性情之際。誠
難處。心君子過慮。爰獻明箴。防微測顯。文麗旨
深。敬納嘉誨。敢酬德音。

1006637

訓

兩階銅人訓

言之有臧。託乎多士。言之不臧。絕之由已。無曰
莫傳。宣于四海。無曰莫聞。響振萬里。樞機之發。
榮辱之徵。怨豈在大。纖介是興。

100663

碑

司空鄭衮碑

陳謨台階，翼和鼎實，顯績成於臺省，清風暢於
所蒞，故能老安少懷，遠至邇親，凡厥縉紳之士，
所以挹酌洪流，含咀英芳者，猶旱苗之仰膏雨，
湛露之晞朝陽也。銘曰：

於鑠元侯，則天垂象，弘操嶽峻，宇量深廣，允恭
克讓，宜哲清明，有始有卒，可大可久，言由忠信，
行履孝友，光光金貂，再冠其首，赫赫皇符，仍折

其部義格皇穹，德冠群后，清風顯烈，沒而不朽。

荊州刺史東武戴侯楊使君碑

肇字季初，滎陽人，封東武伯。薨，謚曰戴。君誕保靈和，繼期載德，宣哲清明，直道高尚。若乃嘉號推賢，博愛濟衆，邦黨服其義，而縉紳慕其風。干時文后，厯數在躬，相國幕府，實允華夏。九德咸事，俊乂在官，成君名器，納字參軍。宏略被於南國，美化行乎江漢。西陵之役，懸軍深入，親薄寇壘，躬行天誅。旣而救兵不進，糧盡道窮，因乃撫

然廻慮殿其衆而返雖爲注受黜勳庸才崇子
天下伏其勇世主思其忠

天不憖其遺聖之臣

天不憖其遺聖之臣

哀文

景獻皇后哀策文

於穆先后，儷皇協運。世宗之胤，德博化光。用儉
禮峻，任姒隆周。后亦母晉，終溫且惠。其儀淑慎，
旣慎其儀。克明禮教，撫翼齊藩。訓成弘操，其慈
有威。不舒不暴，乃家乃邦。是則是效，嗟余艱屯。
仍遭不造，靡恃惟妣。景命弗保，心之云痛。痛貫
穹昊，襲龜筮之良辰。啓幽房之潛墜。整武駕之
隆牡，結龍輶之縞駟。望旂常而崩摧，披輶輶以

增歛口鳴咽以失聲目橫迸以灑淚邈兩絕於
宮闈長無覲於仿佛

哀永逝文

啓夕兮宵興悲絕緒兮莫承俄龍輜兮門側嗟
俟時兮將升嫂姪兮悼惶慈姑兮垂矜聞鳴雞
兮戒朝咸驚號兮撫膺逝日長兮生年淺憂患
衆兮歡樂鮮彼遙思兮離居歎河廣兮宋遠今
柰何兮一舉邈終天兮不反盡余哀兮祖之晨
揚明燎兮援靈輶撤房帷兮席庭筵舉爵觴兮

告永遷、悽切兮增歎、俯仰兮揮淚、想孤魂兮眷
舊宇、視倏忽兮若髣髴、徒髣髴兮在慮靡耳目
兮一遇、停駕兮淹留、徘徊兮故處、周求兮何獲
引身兮當去、去華輦兮初邁、馬迴首兮旋旆、風
泠泠兮入帷、雲霏霏兮承蓋、鳥俛翼兮忘林、魚
仰沫兮失瀨、悵悵兮遲遲、遵吉路兮凶歸、思其
人兮已滅、覽餘跡兮未夷、昔同塗兮今異世、憶
舊歡兮增新悲、謂原隰兮無畔、謂川流兮無岸
望山兮寥廓、臨水兮浩汗、視天日兮蒼茫、面邑

里兮蕭散、匪外物兮或改、固歡哀兮情換、嗟潛
隧兮旣敞、將送形兮長往、委蘭房兮繁華、襲窮
泉兮朽壤、中慕叫兮擗標之子、降兮宅兆、撫靈
輓兮訣幽房、棺冥冥兮延窈窕、戶闔兮燈滅、夜
何時兮復曉、歸反哭兮殯宮、聲有止兮哀無終、
是乎非乎何遑趣、一遇兮目中、旣遇目兮無兆、
曾寤寐兮弗夢、旣顧瞻兮家道長、寄心兮爾躬、
重曰已矣、此蓋新哀之情然耳、渠懷之其幾何、
庶無愧兮莊子、

爲楊長文作弟仲武哀祝文

悠悠上天，我獨何辜。祖考早世，昆弟幼孤。備嘗艱毒，同集蓼荼。父兮生我，過庭靡聞。母兮鞠我，寧一苦辛。日顧日復，我弟我身。竝自垂髮，越于成人。濬哲聰明，純粹溫良。烈烈清風，邦族之望。母氏劬勞，庶爾之報。彼蒼者天，子何不弔。殲我令弟，窮泉是造。無父何怙，無弟何友。煢煢此身，哀哀慈母。煩冤痛毒，撫心思咎。哀爾薄祐，逢家多阻。弱冠未室，盛年絕緒。喪庭寥廓，廬位無主。

冥冥長夜，窈窈玄宇，當復何時，見我仲武，于以
祔之，于其王父，魂而有靈，神其甯處。

京陵公主女王氏哀辭

猗歟公子，季女惟王，生自洪胄，稟茲義方，盼倩
粲麗，窈窕淑良，如彼春蘭，吐葩含芳，葩以霜隕，
芳以歇盡，彼蒼者天，胡寧斯忍，曾未弱笄，無疾
而隕，官朝震驚，靡人不愍，嗟爾母氏，劬勞撫鞠，
恩斯勤斯，是長是育，帷屏媚子，奄離顧復，哀無
廢心，涕不輟目，于以祖之，于掖庭閨，于以送之。

陵岡崔嵬僕馬延眷旌旂飛夕陽失朕睟鳥
忘歸皎皎霄月載盈載微冥冥公子一往不追
長夜無旦孤魂曷依

陽城劉氏妹哀辭

鳥鳴于柏鳥號于荆徘徊躑躅立聞其聲相彼
羽族矧伊人情叩心長叫痛我同生誕育聖善
發奇稚齒如彼名駒昂昂千里劉氏懷寶未曜
隋和伊予輕弱弗克負荷祿微于朝貯匱于家
俾我令妹勤儉備加珍羞罕御器服靡華撫膺

恨毒、逝矣、奈何、哀哀母氏、蒸蒸聖慈、震動擗標、
何痛如之、魂而有靈、豈不慕思、嗟哉往矣、當復
何時、

金鹿哀辭

嗟我金鹿、天姿特挺、鬢髮凝膚、蛾眉螭領、柔情
和泰、朗心聰警、嗚呼上天、胡忍我門、良嬪短世、
令子天昏、旣披我幹、又剪我根、塊如槐木、枯茲
獨存、捐子中野、遵我歸路、將反如疑、迴首長顧、

傷弱子辭

予之長安次于新安千秋亭而弱子天感羸博
之哀乃傷之曰

奈何兮弱子邈棄爾兮邱林還眺兮墳瘞草莽
莽兮木森森伊邃世之遐胄逮祖考之永延咨
吾家之不嗣羌一適而未甄仰崇堂之遺構若
無津而涉川葉落永離覆水不收赤子何辜罪
我之由

悲邢生辭

周文王之苗裔予元舅之洪胄厲操確其不拔

鄉譽著而且就，妙邦畿而高察。雄州間以擢秀，
茂實暢矣而休名未衍。其財至貧，其位至賤而
死之日，奔者盈庭，停弔車而在郊。撫靈櫬以增
悲，瞻輜容而想像。曾無覲乎餘輝，送子兮境垂
永訣。兮路岐，一別兮長絕。盡哀兮告離。

爲任子咸妻作孤女澤蘭哀辭

澤蘭者任子咸之女也。涉三齡，未沒衰而殞。余
聞而悲之，遂爲其母辭。

茫茫造化，爰啓英淑。猗猗澤蘭，應靈誕育。鬢髮

蛾眉巧笑美目顏耀榮若華茂時菊如金之精
如蘭之馨淑質彌暢聰慧日新朝夕顧復夙夜
盡勤彼蒼者天哀此矜人胡甯不惠忍予眇身
俾爾嬰孺微命弗振俯覽衾裯仰訴穹旻弱子
在懷旣生不遂存靡託躬沒無遺類耳存遺響
目想餘顏寢席伏枕摧心割肝相彼鳥矣和鳴
嚶嚶矧伊蘭子音影冥冥彷徨邱隴徒倚墳塋

（The main body of the page contains several columns of extremely faint, illegible text, likely bleed-through from the reverse side of the leaf. The text is organized into approximately 10 vertical columns separated by thin lines.)

1906637

祭文

吊孟嘗君文

人罔貴賤、士無真僞、延入如歸、望賓若企、出握秦機、入專齊政、右盼而羸、強左顧而田、競且以造化爲水、天地爲舟、樂則齊喜、哀則同憂、豈區區之國而大邦是謀、瑣瑣之身而名利是求、畏首畏尾、東奔西囚、志撓於木偶、命懸於狐裘、

爲諸婦祭庾新婦文

潛形幽櫬、甯神舊宇、室虛風生、牀塵帷舉、自我

不見載離寒暑雖則乖隔哀亦時敘啓殯今夕
祖行明朝雨絕華庭埃滅大宵儷執箕箒偕奉
夕朝髣髴未行顧瞻弗獲伏膺飲淚感今懷昔
懷昔伊何祁祁娣姒感今伊何冥冥吾子形未
廢目音猶在耳

哭弟文

視不見兮聽不聞逝日遠兮憂彌殷終皓首兮
何時忘情楚惻兮常苦辛

誄

世祖武皇帝誄

粵若稽古帝皇誕受休命作我晉室赫赫文皇
配天竝日大行龍飛創制改物沉恩汪濊流澤
洋溢上齊七政下綏萬邦四門穆穆五典克從
惟清緝熙於變時雍愛盡事親教加百姓干喪
過哀在祭餘敬后蠶冕服躬籍粢盛六代畢奏
九功咸詠行敦醕樸思貫立妙蒞政端位臨朝
光曜胄子入學辟雍宗禮國老恂恂貴遊濟濟

莫孝匪子。莫悌匪弟。化自外明。訓法以禮。獷彼
吳楚。稱亂三代。世厯五僞。年幾百載。邊垂虔劉。
王化阻闕。羽檄星馳。鉦鼓日戒。帝御群帥。奉辭
奮旅。腹心庭爭。爪牙疑沮。天監獨照。聖策乃舉。
朝服濟江。止戈曜武。野無交兵。役不淹月。僭號
歸命。稽顙晉闕。邪界蠻流。傍納百越。表閭旌善。
德音爰發。虞人獻箴。周書垂誥。酒懼其醜。獸戒
其冒。於我大行。縱心所好。動不踰矩。性與道與。
厭厭酣飲。樂不辨顏。桓桓振旅。田無遊盤。我德

如風民應如蘭靡不夙夜無敢宴安務農望歲
時或不稔小心翼翼恤民以甚御坐不怡撤膳
賑廩西流垂精南金抑施永言孝思天經地義
問誰贊事英彥髦士問誰翼侍博物君子潛明
神鑒從衆屈已道濟群生爲而不恃先天弗違
後天降時萬物熙熙懷而慕思思颺颺縉紳不
謀同辭巖巖岱宗想望翠旗恭惟大行功成不
居議寢封禪心棲冲虛策告不足大平有餘七
十二君方之茂如思樂天德等壽嵩華如何寢

疾背世登遐，遷幸梓宮。孤我邦家，龜筮旣襲，吉日惟良，永指太極。甯神峻陽，群后擗踊，長訣輶輅，聖靈斯顧，豈伊不傷。家無遠邇，邦靡小大，四海供職，同軌畢會。茫茫原野，亭亭素蓋，縞輅解駕，白虎弭旆。龍輶即定，玄闔載扃。如天斯崩，如地斯傾。哀哀庶寮，煢煢自愍。彼蒼者天，胡甯斯忍。聖君不返，我獨旋軫。

太宰魯武公誄

昂昂公侯，實天誕育。八元斯九，五臣茲六。揜討

逆節折衝江湖走欽擒儉梟誕弊吳公于出征
爰整其旅壘未越郊麾不及舉秦涼獲又西戎
即敘他人之賢譬彼丘陵邈矣公侯如日之昇
泰山其頽寢疾不興遐邇曷仰社稷焉憑生則
榮易終哀實難靡不春華鮮克歲寒於呼公隕
率土含酸趙喪望諸列國同傷秦亡蹇叔春者
不相桃李不言下自成行德之休明沒能彌彰

楊荊州誄

有序

維咸甯元年夏四月乙丑晉故折衝將軍荊州

刺史東武戴侯滎陽楊使君薨嗚呼哀哉夫天
子建國諸侯立家選賢與能政是以和周賴尚
父殷憑太阿矯矯楊侯晉之爪牙忠節克明茂
績維嘉將宏王畧肅清荒遐降年不永玄首未
華銜恨沒世命也柰何嗚呼哀哉自古在昔有
生必死身沒名垂先哲所躋行以號彰德以述
美敢託旒旗爰作斯誄其辭曰

邈矣遠祖系自有周昭穆繁昌枝庶分流族始
伯喬氏出楊侯奕世不顯允廸大猷天厭漢德

龍戰未分，伊君祖考，方事之殷，烏則擇木，臣亦
簡君，投心外朝，策名委身，奮躍淵塗，跨騰風雲，
或統驍騎，或據領軍，篤生戴侯，茂德繼期，纂戎
洪緒，克構堂基，弱冠味道，無競惟時，孝實蒸蒸，
友亦怡怡，多才豐藝，彊記洽聞，目睇毫末，心筭
無垠，草隸兼善，尺牘必珍，足不輟行，手不釋文，
翰動若飛，紙落如雲，學優則仕，乃從王政，散璞
發輝，臨軹作令，化行邑里，惠洽百姓，越登司官，
肅我朝命，惟此大理國之憲章，君蒞其任，視民

如傷庶獄明慎刑辟端詳聽參臯呂稱侔于張
改授農正千彼野王倉盈庾億國富兵疆煌煌
文后鴻漸晉室君以兼資參戎作弼用錫土宇
膺茲顯秩青社白茅赤朱其紱魏氏順天聖皇
受終烈烈楊侯實統禁戎司管閭闔清我帝宮
苛慝不作穆如和風謂督勲勞班命彌崇茫茫
海岱立化未周滔滔江漢疆場分流秉文兼武
時惟楊侯旣守東莞乃牧荊州折衝萬里對楊
王休聞善若驚疾惡如讐示威示德以伐以柔

吳夷凶倭僞師畏逼將乘讐釁席卷南極繼塞
糧盡神謀不忒君子之過引曲推直如彼日月
有時則食負執其咎功讓其力亦旣旋旆爲法
受黜退守邱塋杜門不出游目典墳縱心儒術
祁祁縉紳升堂八室靡事不咨無疑不質位貶
道行身窮志逸弗慮弗圖乃寢乃疾昊天不弔
景命其卒嗚呼哀哉子囊佐楚遺言城郢史魚
諫衛以尸顯政伊君臨終不忘忠敬寢伏床蓐
念在朝廷朝達厥辭夕隕其命聖王嗟悼寵贈

衾綈誄德策勲考終定謚群辟動懷邦族揮淚
孤嗣在疚寮屬含悴赴者同哀路人增歎嗚呼
哀哉余以頑蔽覆露重陰仰追先考執友之心
俯感知已識達之深承諱忉怛涕淚霑襟豈忘
載奔憂病是沈在疾不省於亡不臨舉聲增慟
哀有餘音嗚呼哀哉

夏侯常侍誄

夏侯湛字孝若譙國譙人也少知名弱冠辟太
尉府掾賢良方正徵爲太子舍人尚書郎野王

令中書郎南陽相家艱乞還頃之選爲太子僕
未就命而世祖崩天子以爲散騎常侍從班列
也春秋四十有九元康元年夏五月壬辰寢疾
卒於延喜里第嗚呼哀哉乃作誄曰

禹錫立珪實曰文命克明克聖光啓夏政其在
于漢邁勲惟嬰思弘儒業小大雙名顯祖曜德
牧兗及荆父守淮岱治亦有聲英英夫子灼灼
其雋飛辯摘藻華繁玉振如彼隨和發彩流潤
如彼錦纈列素點絢人見其表莫測其裏徒謂

吾生文勝則史心照神交唯我與子且厯少長
逮觀終始子之承親孝齊閔參子之友悌和如
瑟琴事君直道與朋信心雖實唱高猶賞爾音
弱冠厲翼羽儀初升公弓旣招皇輿乃徵內贊
兩宮外宰黎蒸忠節允著清風載興泱彼樂都
寵子惟王設官建輔妙簡邦良用取喉舌相爾
南陽惠訓不倦視民如傷乃眷北顧辭祿延熹
余亦偃息無事明時疇昔之游二紀于茲班白
蒿手可歎如之居吾語汝衆實勝寡人惡儔異

俗疵文雅執戟疲楊長沙投賈無謂爾高恥居
物下子乃洗然變色易容慨然歎曰道固不同
爲仁由已匪我求蒙誰毀誰譽何去何從莫涅
匪緇莫磨匪磷子獨正色居屈志申雖不爾以
猶致其身獻替盡規媚茲一人讜言忠謀世祖
是嘉將僕儲皇奉轡承華先朝末命聖烈顯加
入侍帝闈出光厥家我聞積善神降之吉宜享
遐紀長保天秩如何斯人而有斯疾曾未知命
中年隕卒嗚呼哀哉惟爾之存匪爵而貴甘食

美服重珍兼味，臨終遺誓，永錫爾類，歛以時襲，
殯不簡器，誰能拔俗，生盡其養，孰是養生而薄
其葬，淵哉若人，縱心條暢，傑操明達，困而彌亮，
柩輅旣祖，容體長歸，存亡永訣，逝者不追，望子
舊車，覽爾遺衣，悞抑失聲，迸涕交揮，非子爲慟，
吾慟爲誰，嗚呼哀哉，日往月來，暑退寒襲，零露
霑凝，勁風淒急，慘爾其傷，念我良執，適子素館，
撫孤相泣，前思未弭，後感仍集，積悲滿懷，逝矣
安及，嗚呼哀哉。

馬汧督誄

惟元康七年秋九月十五日晉故督守關中侯
扶風馬君卒。嗚呼哀哉！初，雍郃之內屬羌反，未
弭，而編戶之氏又肆逆焉。雖王旅致討，終於殄
滅，而蜂蠆有毒，驟失小利，俾百姓流亡，頻於塗
炭。建威喪元於好時，州伯宵遯平大谿。若夫偏
師裨將之隕首覆車者，蓋以十數。剖符專城，紆
青拖墨之司，奔走失其守者，相望於境。秦隴之
僭，輦更爲魁。旣已襲汧，而館其縣子，以眇爾之

身介乎重圍之裏。率寡弱之衆。據十雉之城。羣
氏如蝟毛而起。四面雨射城中。城中鑿穴而處。
負戶而汲。木石將盡。樵蘇乏竭。芻蕘聲絕。於是
乎發梁棟而用之。矧以鐵鑕機。關旣縱。礪而又
升焉。爨陳焦之麥。柿栢桷之松。用能薪芻不匱。
人畜取給。青煙傍起。櫓馬長鳴。凶醜駭而疑懼。
乃闕地而攻。子命穴浚。塹寘壺。鑪瓶甒以偵之。
將穿城響作。因焚穢火。薰之。潛氏殲焉。久之。安
西之救至。竟免虎口之厄。全數百萬石之積。文

契書於幕府。聖朝疇咨，進以顯秩，殊以幢蓋之制。而州之有司，乃以私隸數口，穀數十斛，考訊吏兵，以槓楚之辭，連之。大將軍屢抗其疏，曰：敦固守孤城，獨當羣寇，以少禦衆，載離寒暑，臨危奮節，保穀全城。而雍州從事忌敦勲效，極推小疵，非所以褒獎元功。宜解敦禁劾，假授詔書，遽許而子固已下獄，發憤而卒也。朝廷聞而傷之，策書曰：皇帝咨故督守關中侯馬敦，忠勇果毅，率萬有方，固守孤城，危逼獲濟，寵秩未加，不幸。

喪亡朕用悼焉。今追贈牙門將軍印綬祠以少牢。鬼而有靈嘉茲寵榮然潔士之聞穢其庸致思乎。若乃下吏之肆其噤害則皆妬之徒也。嗟乎妬之欺善抑亦買首之讐也。語曰或戒其子慎無爲善言固可以若是悲夫。昔乘邱之戰縣賁父御魯莊公馬驚敗績賁父曰他日未嘗敗績而今敗績是無勇也。遂死之。圉人浴馬有流矢在白肉。公曰非其罪也。乃誅之。漢明帝時有司馬叔持者自日於都市手劒父讐視死如歸。

亦命史臣班固爲之誄。然則忠孝義烈之流，慨非命而死者，綴辭之士未之或遺也。天子旣已策而贈之，微臣託乎舊史之末，敢闕其文哉。乃作誄曰：

知人未易，人未易知。嗟茲馬生，位末名卑。西戎猾夏，乃奮其奇。保此汧城，救我邊危。彼邊奚危，城小粟富。子以眇身而裁其守，兵無加衛，墉不增築。婪婪群狄，豺虎競逐。鞏更恣睢，潛跼官寺。齊萬虓闕，震驚台司。聲勢沸騰，種落煽熾。旌旗

潘黃門集

卷全

電舒戈矛林植彤珠星流飛矢雨集惴惴士女
號天以泣爨麥而炊負戶以汲累卵之危倒懸
之急馬生爰發在險彌亮精貫白日猛烈秋霜
稜威可厲懦夫克壯霑恩撫循寒士挾纊蠢蠢
犬羊阻衆陵寡潛隧密攻九地之下愜愜窮城
氣若無假昔命懸天今也惟馬惟此馬生才博
智贍偵以瓶壺剔以長塹鋪未見鋒火以起燭
熏尸滿窟培穴以歛木石匱竭其稗空虛矚然
馬生故若有餘蜀梁爲壘柿松爲芻守不乏械

櫪有鳴駒，哀哀建威。身伏斧質，悠悠烈將。覆軍
喪器，戎釋我徒。顯誅我帥，以生易死。疇克不二，
聖朝西顧。關右震惶，分我汧、隴。化爲寇糧，實賴
夫子。思暮彌長，咸使有勇。致命知方，我雖末學。
聞之前典，十世宥能。表墓旌善，思人愛樹。甘棠
勿剪，矧乃君子。功深疑淺，兩造未具。儲隸蓋鮮，
孰是勲庸而不獲免。猾哉部司，其心反側。斲善
害能，醜正惡直。牧人逶迤，自公退食。聞穢鷹揚，
曾不戢翼。忘爾大勞，猜爾小利。苟莫開懷，于何

不至慨慨馬生、硜硜高致、發憤囹圄、沒而猶眊、
嗚呼哀哉、安平出奇、破齊克完、張孟運籌、危趙
獲安、汧人賴子、猶彼談單、如何吝嫉、搖之筆端、
傾倉可賞、矧云私粟、狄隸可頒、況曰家僕、剔子
雙龜貫以三木、功存汧城、身死汧獄、凡爾同圉、
心焉摧剝、扶老携幼、街號巷哭、嗚呼哀哉、明明
天子、旌以殊恩、光光寵贈、乃牙其門、司勳領爵、
亦兆後昆、死而有靈、庶慰冤冤、嗚呼哀哉、

楊綏字仲武，滎陽宛陵人也。中領軍肅侯之曾孫，荊州刺史戴侯之孫，東武康侯之子也。八歲喪父，其母鄭氏，光祿勳密陵成侯之元女，操行甚高，恤養幼孤，以保父夫家，而免諸艱難。戴侯康侯多所論著，又善草隸之藝。子以妙年之秀，固能綜覽義旨，而軌式模範矣。雖舅氏隆盛，而孤貧守約，心安陋巷，體服菲薄，余甚奇之。若乃清才雋茂，盛德日新，吾見其進，未見其已也。旣藉三葉世親之恩，而子之姑，予之伉儷焉。徃歲

卒於德宮里喪服周次綢繆累月苟人必有心
此亦欵誠之至也不幸短命春秋二十九元康
九年夏五月己亥卒嗚呼哀哉乃作誄曰

伊子之先奕葉熙隆惟祖惟曾載揚休風顯考
康侯無祿早終名器雖光勲業未融篤生吾子
誕茂淑姿克岐克嶷知章知微鈞深探賾味道
研幾匪直也人邦家之輝子之邁閔曾未鬣髻
如彼危根當此衝飈德之休明靡幽不喬弱冠
流芳儔聲清劭爾舅惟榮爾宗惟瘁幼秉殊操

達豐安匱撰錄先訓俾無隕墜舊文新藝罔不
畢肄潘楊之穆有自來矣矧乃今日慎終如始
爾休爾戚如實在已視予猶父不得猶子敬亦
旣篤愛亦旣深雖殊其年實同厥心日昃景西
望子朝陰如何短折背世湮沈嗚呼哀哉寢疾
彌留守茲孝友臨命忘身顧戀慈母哀哀慈母
痛心疾首噉噉同生悽悽諸舅春蘭擢莖方茂
其華荆實挺璞將剖於和含芳委曜毀璧摧柯
嗚呼仲武痛哉奈何德宮之艱同次外寢惟我

與爾對筵接枕、自時迄今、曾未盈稔、姑姪繼隕、
何痛斯甚、嗚呼哀哉、披帙散書、屢覩遺文、有造
有爲、或草或真、執玩周復、想見其人、紙勞于手、
涕霑于巾、龜筮旣襲、埏隧旣開、痛矣楊子、與世
長乖、朝濟洛川、夕次山隈、歸鳥頽頽、行雲徘徊、
臨穴永訣、撫櫬盡哀、遺形莫紹、增慟余懷、寃兮
往矣、梁木實摧、嗚呼哀哉、

宣城宣君誄

行成于已。名生于人。考終定謚。實曰宣君。祝宗

蒞事卿相奉引輕車整駕介士列陣鸞輅依容
輶車升襯

庾尚書誄

寬而能懷威而不猛化行如形民應如影晷晷
虛坐翩翩玄幕几席生塵空館寥廓

南陽長公主誄

昔唐女嬪嫈書敘釐降之美周姬適齊詩詠肅
雍之歌漢之新野以節義垂號千載伊晉之獻
主以聰明睿智考終定謚茲可謂母儀純備邁

蹤古烈者已、惜乎不永、背世湮沈、爰託素旂、式章徽音、

主之誕育、旣纂洪胄、德之休明、亦固天授、思心婉孌、淑質純茂、母儀不忒、內則靡疚、肇自弱笄、有馥其芬、言告言歸、作合於荀、在貴思降、處逸能勤、上虔諸姑、傍接支嬪、內諧閨闈、外和族姻、終溫且惠、淑慎其身、積善餘慶、啓茲名胤、勵以惠肅、誨以柔順、主實體化、不言而信、二子遵式、匪嚴而峻、於穆獻后、奕代熙盛、重作大司、黎牧

火正國之仁姑家之慈母天道輔賢宜享遐壽
如何短命曾不華首寢疾弗興繁榮摧朽嗚呼
哀哉容車戒路祖奠在庭駢驂躊躇服馬悲鳴
皇輿親臨望旗失聲列辟咸起灑淚霑纓嗚呼
哀哉既次墓門降柩升輶靈衣從風素幕生塵
明燎守夜竦紼俟晨噉噉遺嗣煢煢孤臣號無
廢音涕不輟巾

皇女誄

厥初在鞠玉盾華繁玄髮脩曜蛾眉連娟清顙

橫流明眸朗鮮、迎時夙智、望歲能言、亦旣免懷、
提携紫庭、聰惠機警、授色應聲、疊疊其進、好曰
之經、辭令容止、閑於幼齡、猗猗春蘭、柔條含芳、
落英彫矣、從風飄揚、妙好弱媛、窈窕淑良、孰是
人斯、而離斯殃、靈殯旣祖、次此暴廬、披覽遺物、
徘徊舊居、手澤未改、領臆如初、孤魂遐逝、存亡
永殊、嗚呼哀哉、

賈充誄

年踰知命、位極人臣、家無餘祿、貴而食貧、

詩

關中詩 十六章

元康六年氏賊齊萬年於關中反亂既平帝命諸臣作關中詩

於皇時晉受命既固三祖在天聖皇紹祚德博
化光刑簡枉錯微火不戒延我寶庫

蠢爾戎狄狡焉思肆虞我國青窺我利器獄牧
慮殊威懷理二將無專策兵不素肄

翹翹趙王請徒三萬朝議惟疑未逞斯願桓桓
梁征高牙乃建旗蓋相望偏師作援

虎視耽耽、威彼好時、素甲日耀、玄幕雲起、誰其繼之、夏侯卿士、惟系惟處、別營基時、

夫豈無謀、戎士承平、守有完郭、戰無全兵、鋒交卒奔、孰免孟明、飛檄秦郊、告敗上京、

周殉師令、身膏氏斧、人之云亡、貞節克舉、盧播違命、投畀朔土、爲法受惡、誰謂荼苦、

哀此黎元、無罪無辜、肝腦塗地、白骨交衢、夫行妻寡、父出子孤、俾我晉民、化爲狄俘、

亂離斯瘼、日月其稔、天子是矜、肝食宴寢、主憂

臣勞孰不祇懍、愧無獻納尸素以甚。
皇赫斯怒、爰整精銳、命彼上谷、指日遄逝、親奉
成規、稜威遐厲、首陷中亭、揚聲萬計、
兵固詭道、先聲後實、聞之有司、以萬爲一、紂之
不善、我未之必、虛帛滿德、繆彰甲吉、
雍門不啓、陳汧危偪、觀遂虎奮、感恩輸力、重圍
克解、危城載色、豈曰無過、功亦不測、
情固萬端、于何不有、紛紜齊萬、亦孔之醜、曰納
其降、曰梟其首、疇真可掩、孰僞可久、

既徵爾辭、既蔽爾訟、當乃明實、否則證空、好爵
既縻、顯戮亦從、不見竇林、伏尸漢邦、
周人之詩、寔曰采薇、北難獫狁、西患昆夷、以古
況今、何足曜威、徒愍斯民、我心傷悲、
斯民如何、荼毒于秦、師旅既加、饑饉是因、疫癘
淫行、荆棘成榛、絳陽之粟、浮于渭濱、
明明天子、視民如傷、申命羣司、保爾封疆、靡暴
于衆、無陵于疆、惴惴寡弱、如熙春陽、

爲賈謐作贈陸機 十一章

肇自初創、二儀絪縕、粵有生民、伏羲始君、結繩
闡化、八象成文、芒芒九有、區域以分、
神農更王、軒轅承紀、晝野離疆、爰封衆子、夏殷
旣襲、宗周繼祀、綿綿瓜瓞、六國互峙、
彊秦兼并、吞滅四隅、子嬰面櫬、漢祖膺圖、靈獻
微弱、在涅則渝、三雄鼎足、孫啓南吳、
南吳伊何、僭號稱王、大晉統天、仁風遐揚、僞孫
銜璧奉土、歸疆婉婉、長離凌江、而翔
長離云誰、咨爾陸生、鶴鳴九臯、猶載厥聲、况乃

海隅播名上京，爰應旌招撫翼宰庭。

儲皇之選，實簡惟良。英英朱鸞，來自南岡。曜藻
崇正，玄冕丹裳。如彼蘭蕙，載採其芳。

藩岳作鎮，輔我京室。旋反桑梓，帝弟作弼。或云
國宦清塗，攸失吾子。洗然恬淡，自逸。

廊廟惟清，俊乂是延。擢應嘉舉，自國而遷。齊轡
羣龍，光讚納言。優游省闈，珥筆華軒。

昔余與子，繼綬東朝。雖禮以賓，情通友僚。嬉娛
絲竹，撫鞞舞韶。修日朗月，攜手逍遙。

自我離羣二周于今雖簡其面分著情深予其
超矣實慰我心發言爲詩俟望好音
欲崇其高必重其層立德之柄莫匪安恒在南
稱甘度壯則橙崇子鋒穎不頽不崩

壯芒送別王世貞

朱鑣旣揚四轡旣整如馬言餞行告離芒嶺情有
遷延日無餘影迴轅南翔心焉北騁

家風詩

綰髮綰髮髮亦鬢止。日祇日祇敬亦慎止。靡專

靡有受之父母。鳴鶴匪和。析薪弗荷。隱憂孔疚。
我堂靡構。義方旣訓。家道頽頽。豈敢荒甯。一日
三省

於賈謐坐講漢書

治道在儒。弘儒由人。顯允魯侯。文質彬彬。筆下
摘藻。席上敷珍。前疑惟辨。舊史惟新。惟新爾史。
旣辨爾疑。延我寮友。講此微辭。

離合

佃漁始化。人民穴處。意守醇樸。音應律呂。桑梓

被源卉木在野，錫鸞未設，金石拂舉，害咎蠲消。
吉德流普，谿谷可安，奚作棟宇，嫣然以憇焉。懼
外侮熙神，委命已求，多祐嘆彼季末，口出擇語，
誰能默識言喪厥所，壟畝之諺，龍潛巖阻，勘義
崇亂少長失敘。

金谷集作詩

王生和鼎實，石子鎮海沂，親友各言邁，中心悵
有違，何以敘離思，携手游郊畿，朝發晉京陽，夕
次金谷湄，迴谿縈曲阻，峻阪路威夷，綠池泛淡

淡青柳何依依，濫泉龍鱗瀾。

一作濶

激波連珠揮。

前庭樹沙棠，後園植烏桺。靈囿繁石

善作若

榴茂

林列芳梨，飲至臨華沼。遷坐登隆坻，玄醴染朱

顏。但慙杯行遲，揚桴撫靈鼓。簫管清且悲，春榮

誰不慕。

五臣作耀

歲寒良獨希，投分寄石友。白首同

所歸。

河陽縣作二首

微身輕蟬翼，弱冠忝嘉招。在疚妨賢路，再升上

宰朝。猥荷公叔舉，連陪廁王寮。長嘯歸東山，擁

耒耨時苗幽谷茂纖葛峻巖敷榮條落英隕林
趾飛莖秀陵喬卑高亦何常升降在一朝徒恨
良時泰小人道遂消譬如野田蓬幹流隨風飄
昔倦都邑游今掌河朔徭登城眷南顧凱風揚
微綃洪流何浩蕩修芒鬱岩崑誰謂晉京遠室
邇身實遠誰謂邑宰輕令名患不劭人生天地
間百年孰能要歛如敲石火譬若截道颺齊都
無遺聲桐鄉有餘謠福謙在純約害盈由矜驕
雖無君人德視民庶不忼

日夕陰雲起登城望洪河川氣冒山嶺驚湍激
巖阿歸鴈映蘭時五臣作詩游魚動圓波鳴蟬厲寒
音時菊耀秋華引領望京室南路在伐柯大厦

五臣作夏緬無覲崇芒鬱嵯峨總總都邑人擾擾俗

化訛依水類浮萍寄松似懸蘿朱博糾舒慢楚
風被琅邪曲蓬何以直託身以叢麻黔黎竟何
常政成在民和位同單父邑愧無子賤歌豈敢
陋微官但恐忝所荷

在懷縣作二首

南陸迎修景，朱明送未垂。初伏啓新節，隆暑方
赫曦。朝想慶雲興，夕遲白日移。揮汗辭中宇，登
城臨清池。涼飈自遠集，輕襟隨風吹。靈囿耀華
果，通衢列高椅。瓜瓞蔓長苞，薑芋紛廣畦。稻栽
肅芊芊，黍苗何離離。虛薄乏時用，位微名日卑。
驅役宰兩邑，政績竟無施。自我違京輦，四載迄
于斯。器非廊廟姿，屢出固其宜。徒懷越鳥志，眷
戀想南枝。

春秋代遷逝，四運紛可喜。寵辱易不驚，戀本難

爲思我來冰未泮時暑忽隆熾感此還期淹歎
彼年往駛登城望郊甸游目厯朝寺小國寡民
務終日寂無事白水過庭激綠槐夾門植信美
非吾土祇攪懷歸志眷然顧輦洛山川邈離異
願言旋舊鄉畏此簡書忌祇奉社稷守恪居處
職司

內顧詩二首

靜居懷所歡登城望四澤春草鬱青青桑柘何
奕奕芳林振朱榮淥水激素石初征冰未泮忽

焉。袵絺綌，漫漫三千里。迢迢遠行客，馳情戀朱
顏。寸陰過盈尺，夜愁極清晨。朝悲終日夕，山川
信悠永。願言良弗獲，引領訊歸期。沈思不可
釋，獨悲安所慕。人生若朝露，綿邈寄絕域。眷戀想
平素，爾情既來追。我心亦還顧，形體隔不達。精
爽交中路，不見山下松。隆冬不易故，不見澗邊
栢。歲寒守一度，無謂希見疎。在遠分彌固，

悼亡詩三首

荏苒冬春謝，寒暑忽流易。之子歸窮泉，重壤永

幽隔私懷誰克從。淹留亦何益。僂俛恭朝命。迴
心反初役。望廬思其人。入室想所歷。帟屏無髮
髴。翰墨有餘跡。流芳未及歇。遺挂猶在壁。悵恍
如或存。周遑忡驚惕。如彼翰林鳥。雙栖一朝隻。
如彼游川魚。比目中路析。春風綠隰來。晨雷承
簷滴。寢息何時忘。沉憂日盈積。庶幾有時衰。莊
年猶可擊。

皎皎窗中月。照我室南端。清商應秋至。溽暑隨
節闌。凜凜涼風升。始覺夏衾單。豈曰無重纊。誰

與同歲寒。歲寒無與同。朗月何朧朧。展轉盼枕
席。長簟竟牀空。牀空委清塵。室虛來悲風。獨無
李氏靈。髣髴覩爾容。撫衿長歎息。不覺涕霑胸。
霑胸安能已。悲懷從中起。寢興目存形。遺音猶
在耳。上慚東門吳。下愧蒙莊子。賦詩欲言志。此
志難具紀。命也可奈何。長戚自令鄙。

曜靈運天機。四節代遷逝。嗟嗟朝露凝。烈烈夕
風厲。奈何悼淑儷。儀容永潛翳。念此如昨日。誰
知已卒歲。改服從朝政。哀心寄私制。茵幬張故

房。朔望臨爾祭。爾祭詎幾時。朔望忽復盡。衾裳
一毀撤。千載不復引。塵塵墓月周。戚戚彌相愍。
悲懷感物來。泣涕應情隕。駕言陟東阜。望墳思
紆軫。徘徊墟墓間。欲去復不忍。徘徊不忍去。徒
倚步踟躕。落葉委埏側。枯茅帶墳隅。孤魂獨煢
煢。安知靈與無。投心遵朝命。揮涕強就車。誰謂
帝宮遠。路極悲有餘。

哀詩

灌。如。葉。落。樹。邈。若。雨。絕。天。雨。絕。有。歸。雲。葉。落。何。

時連山氣冒岡嶺，長風鼓松柏。堂虛聞鳥聲，室
暗如日夕。晝愁奄逮昏，夜思忽終昔。展轉獨悲
窮，泣下沾枕席。人居天地間，飄若遠行客。先後
詎能幾，誰能弊金石。

思子詩

造化甄品物，天地代虛盈。奈何念稚子，懷奇隕
幼齡。追想存髣髴，感道傷中情。一往何時還，于
載不復生。

別詩

堪爲成都王軍司馬
岳送至北邙別作詩

微微髮膚受之父母。戔戔王侯中外之首。子親
伊姑。我父唯舅。

閣柱謠

閣東有大牛。王濟鞅裴楷鞅。和嶠刺促不得休。

世說作和嶠鞅裴楷鞅
王濟別勗不得休云

本傳

潘岳字安仁，滎陽中牟人也。祖瑾，安平太守，父
玠，琅邪內史。岳少以才穎見稱，鄉邑號爲奇童，
謂終賈之儔也。早辟司空太尉府，舉秀才。太始
中，武帝躬耕籍田，岳作賦以美其事。岳才名冠
世，爲衆所疾，遂栖遲十年。出爲河陽令，負其才
而鬱鬱不得志。時尚書僕射山濤領吏部，王濟
裴楷等竝爲帝所親遇。岳內非之，題閣道爲謠。
後轉懷令，時以逆旅逐末廢農，奸淫亡命多所

依湊，敗亂法度，勅當除之。十里一官攤，使老小貧戶守之。又差吏掌主，依客舍收錢。岳上其議，朝廷從之。岳頻宰二邑，勤于政績，調補尚書度支郎，遷廷尉評，以公事免。楊駿輔政，高選吏佐，引岳爲太傅主簿。駿誅除名，初譙人公孫宏少孤，貧客田于河陽，善鼓琴，頗屬文。岳之爲河陽令，愛其才藝，待之甚厚。至是，宏爲楚王瑋長史，專殺生之政，時駿綱紀皆當從坐，同署主簿朱振已就戮。岳其夕取急在外，宏言之瑋，謂之假。

吏故得免。未幾，選爲長安令。作西征賦，述所經人物山水。文清旨，誼辭多不錄。徵補博士，未召。以母疾，輒去官。免尋爲著作郎，轉散騎侍郎。遷給事黃門侍郎。岳性輕躁，趨世利，與石崇等諂事賈謐。每候其出，與崇輒望塵而拜，構愍懷之。文岳之辭也。謐二十四友，岳爲其首。謐晉書限斷亦岳之詞也。其母數誚之曰：爾當知足而乾沒，不已乎？而岳終不能改。旣仕宦不達，乃作閑居賦。初，蒞爲琅邪內史，孫秀爲小史，給岳而狡。

黠自喜。岳惡其爲人數撻辱之。秀常銜忿。及趙
王倫輔政。秀爲中書令。岳于省內謂秀曰。孫令
猶憶疇昔周旋。不答曰。中心藏之。何日亡之。岳
于是自知不免。俄而秀遂誣岳及石崇。歐陽建
謀奉淮南王允齊王冏爲亂。誅之。夷三族。岳將
詣市。與母別曰。負阿母。初被收。俱不相知。石崇
已送在市。岳後至。崇謂之曰。安仁。卿亦復爾邪。
岳曰。可謂白首同所歸。岳金谷詩云。投分寄石
友。白首同所歸。乃成其讖。岳母及兄侍御史釋

弟燕令豹司徒掾據據弟詵兄弟之子已出之
女無長幼一時被害唯釋子伯武逃難得免而
豹女與其母相抱號呼不可解會詔原之岳美
姿儀辭藻絕麗尤善爲哀誄之文少時常挾彈
出洛陽道婦人遇之者皆連手縈繞投之以果
遂滿車而歸時張載甚醜每行小兒以瓦石擲
之委頓而反

史臣曰安仁思緒雲騫詞鋒景煥前史傳於賈
誼先達方之士衡賈論政範源王化之幽蹟潘

著哀詞。貫人靈之情。性機文喻。海韞蓬山而育。
蕪岳藻如。江濯美錦而增綸。混三家以通校。爲
二賢之亞匹矣。然其挾彈盈果。拜塵趨貴。蔑棄
倚門之訓。乾沒不逞之間。斯才也。而有斯行也。
天之所賦。何其駁歟。

贊曰。岳實含章。藻思抑揚。趨權冒勢。終亦罹殃。

